

**Kalaallit ilinniagaqartut, ilinniarnissartik siunertaralugu nunanut allanut
nuukkallarsimasut Inatsisartunut qinersinerni qinerseqataasalernissaasa
sulissutigingasuarnissaat pillugu Naalakkersuisut peqquneqarnissaannik Inatsisartut
aalajangiiffigisassaattut siunnersuut.**

pillugu

Inatsisinut Ataatsimiititaliap

ISUMALIUTISSIISUTAA

Siunnersuutip aappassaaneerneqarnerani saqqummiunneqartoq

Suliarinninnermini Inatsisinut Ataatsimiititaliaq ukuninnga inuttaqarpoq:

Inatsisartunut ilaasortaq Isak Hammond, Inuit Ataqatigiit, siulittaasoq
Inatsisartunut ilaasortaq Andreas Uldum, Demokraatit, siulittaasup tullia
Inatsisartunut ilaasortaq Doris Jakobsen, Siumut
Inatsisartunut ilaasortaq Storm Ludvigsen, Inuit Ataqatigiit
Inatsisartunut ilaasortaq Kristian Jeremiassen, Siumut
Inatsisartunut ilaasortaq Jørgen-Ole Nyboe Nielsen, Demokraatit

Siunnersuutip imarisaa

Siunnersuuteqartup siunnersuutigaa, Kalaallit ilinniagaqartut, ilinniarnissartik siunertaralugu nunanut allanut nuukkallarsimasut Inatsisartunut qinersinermi peqataasarnerisa siuarsarneqarnissaanik sulissutiginissaa pillugu Naalakkersuisut peqquneqassasut.

Maleruagassat atuuttut malillugit inuuusuttu taakku Inatsisartunut qinersinermut atatillugu qinersisinnaatitaanertik attatiinnartarpaat, taamaakkaluartorli kommunimit nuuffigisaminiit qinersisinnasut allattorsimaffiannit peerneqartarpuit. Inatsisartunut qinersisoqassatillugu taamaasilluni ilinniartup nammineq kommuunemut nuuffigisaminut qinnutigisariaqartarpaa qinersisinnasut allattorsimaffiannut ilanngunneqarnissani imallunniit allattorsimaffianniiginnarusukkuni. Ukiut marluk qaangiukkaangata periuseq uteqqinnejassaaq.

Ilinniartup maleruagassat tamakku ilisimanngippagit, taamaattumillu qinersinissap nalunaarutigineqarnerata kingorna atsaat qinersisinnasut allattorsimaffiannut ilanngunneqarnissamut qinnuteqarsimaguni, qinersinermi qinersisinnaatitaanissani ajornartorsiutigilersinnaavaa. Qinersisinnaatitaanermi piumasaqaataavoq, qinigaanermut allattaavinnut ilanngunneqarnissap kingusinnerpaamik ulloq qinersivissaq sapaatip

akunnerinik arfinilinnik sioqqullugu aalajangiiffigineqareersimanissaa. Siunnersuuteqartup siunnersuumminut tunngavilersuutimini taavaa,

”Taamaattoqarnerata kalaallit Danmarkimi ilinniagaqartut qinersisinnasut amerlassusaat qularnangitsumik sunniuteqarfigisarpaa, tamannalu ajuusaarnarpooq. Atorfissaqartippapput kalaallit ilinniagaqartut nunagisamik avataanut nuukkallartut Kalaallit Nunaannut soqutiginninnerminnik akisussaaqataanerminnullu misigisimanerisa aalajangiusimaneqarnissaa. Taamaattumik ilinniartut aamma Kalaallit Nunaata soqutigisariaqarpaa sapinngisamik akorngusersuutaasinnaasunik pilersitsiorntunnginnissarput qulakteerlugulu kalaallit ilinniartut Inatsisartunut qinersinerni qinersisinnajuarnissaat.”

Siunnersuuteqartup ajornartorsiummut tassunga aaqqiissutissamik aalajangersimasumik Naalakkersuisut pituttorneqarnissaat kissaatigisimanngilaa. Taamaattorli siunnersuuteqartup aaqqiissutissatut periarfissat isumaliutigineqarsinnaasut tikkupai:

- Sapaatip akunnerinik arfinilinnik piffissaliinerup allangortinnissaa, taamaaliornikkullu qinersisussat allassimaffiannut qinersinerup nalunaarutigereernerani ilanngunneqarnissaminut ilinniartut pitsaanerusumik periarfissinnejassammata.
- Ilinniartut periarfissillugit Kalaallit Nunaata avataani ilinniariartornerminni ilinniagaqarnersiutisiniarlutik qinnuteqarnerminnut atatillugu krydsiliillutik nalunaarutigisarsinnaavaat qinersisinnasut allassimaffianiiginnarnissartik.
- Malittarisassat atuuttut allangortinnissaat, taamaasilluni ilinniartut Kalaallit Nunaanniit nuukkallartut qinersisussat allassimaffianniiginnassallutik, nammineerlutik peerneqarnissartik kissaatigisimannngippassuk.
- Ilinniartut nooqqaarnerannut atatillugu, tamatumalu kingorna ukiut marlukkaarlugit qinersisussat allassimaffianiiginnarnissaannik periarfissap tigussaasumik erseqqissaatiginissaa – assersuutigalugu qinersisinnanerup attatiinnarnissaanik periarfissaq pillugu atuagaaqqamik paasissutissiissutalimmik, kiisalu tamatumunnga atugassamik qinnuteqarnermut immersugassamik ilinniartup nassitsiffingeratigut.

Siunnersuummut Inatsisinut Ataatsimiititaliap oqaaseqaatai

Inatsisinut Ataatsimiititaliap isumaqatigiittup tamakkiisumik siunnersuutip siunertaa tapersorsorpa: tassa Inatsisartunut qinersinermi, kalaallit ilinniartut qinersisinnatitaaneranni tigussaasumik akornutaasinnaasut sapinngisamik annikillisarnissaat. Siunnersuutip siullermeeraluni suliarineqarnerani partiit tamarmiusut anguniakkamut isumaqataapput.

Siunnersuuteqartup tunngavilersuutimini siunnersuutip atuuttussanngortinnissaanut periarfissat assigiinngitsut tikkuarai Inatsisinut Ataatsimiititaliap paasivaa, kisianni siunnersuut akuerineqassappat, Naalakkersuisunit qanoq siunnersuutip iluseqarluni atuuttussanngortinnejarnissaa Naalakkersuisut nammineerlutik aalajangissavaat.

Inatsisinut Ataatsimiititaliap aamma paasivaa, siunnersuut Naalakkersuisunit akuerissassanngorlugu inassutigineqartoq, suliallu ingerlateqqinnerani siunnersuuteqartup qanoq aaqqiissuteqarnissamut periarfissatut tikkugai, ilanngunneqarsinnaasut oqaatigalugu,

Inatsisartullu inatsisaannik kingusinnerusukkut allanngueratarsinnaanermut atatillugu naliliivigineqarumaarluni.

Aaqqiissutissatut siunnersuutit ataasiakkaat inatsisilerineq eqqarsaatigalugu piviusunngortinneqarsinnaanerannik naliliineq apersorneqarnermini Naalakkersuisup Anthon Frederiksenip erseqqinnerusumik nassuaatigaa.

Piffissakinnerli pissutigalugu inatsisitigut allatigullu aporfiusinnaasut tamakkiisumik qulaajarnissaat pisinnaasimanngilaq.

Apersuinermi paasissutissat Naalakkersuisoq Anthon Frederiksenip saqqummiussai tunngavigalugit ersarippoq atuuttussanngorlugit iliuusissatut siunnersuutigisat sisamaasut ilaat marluk pisariitsumik atuuttussanngortinneqarsinnaasutut isikkoqarmata.

Siullertut sapaatip akunnerinik arfinilinnik periarfissaqartitaanermik allannguisinnaaneq. Malittarisassat ullumikkut atuuttut malillugit, kalaallit ilinniariarlutik Danmarkimut nuukkallarnikut ulloq qinersiffiusoq kingusinnerpaamik sapaatip akunnerinik arfinilinnik sioqqullugu qinersisussat allassimaffiannut ilanngussimanngikkunik Inatsisartunut qinersinermut peqataasinnaanngillat. Naalakkersuisoq paaasissutissiivoq Sapaatit akunnerinik arfinilinnik periarfissiinerup sapaatip akunnerinut pingasunut appartinnissaata piviusunngortinnissaa aporfinnik nassataqassanngitsutut Naalakkersuisoqarfimmit nalilerneqartoq, Kalaallit Danmarkimi ilinniartut, Inatsisartunut qinersinissap nalunaarutiginera sioqqullugu qinersisussat allassimaffiannut ilanngussimanngitsut, taamaasillutik qinersisussat allassimaffiannut ilanngunnissamut angumersinissamut periarfissaat pitsaanerulissaq. Taanna aaqqiissutissatut periarfissaq Kalaallit Nunaanni Inatsisartunut qinersisarneq pillugu Inatsisartut inatsisaannik pisariitsunnguamik allannguinermik pisariaqartitsivoq.

Periarfissaq alla pisariitsoq tassaavoq Ilinniartut nooqqaernerannut atatillugu, tamatumalu kingorna ukiut marlukkaarlugit qinersisussat allassimaffianiiginnarnissaannik periarfissap tigussaasumik erseqqissaatiginissaa (assersuutigalugu qinersisinnaanerup attatiinnarnissaanik periarfissaq pillugu atuagaqqamik paasissutissiissutitalimmik, kiisalu tamatumunnga atugassamik qinnuteqarnermut immersugassamik ilinniartup nassitsiffigineratigut). Naalakkersuisup apersuiffimmie paasissutissiissutigaa, Naalakkersuisut periarfissaq taanna pitsasutut isigigaat, tassungali atatillugu Naalakkersuisut akissuteqaataannut innersuussilluni, tassanilu ersippoq Kalaallit Nunaata Københavnimi sinniisia tamanna sioqqullugu, assersuutigalugu kalaallit illuinut, ilinniartoqarfinnut, ilinniartut najugaqarfiinut kalaallillu ilinniartut Danmarkimi kattuffiannut (Avalak) ulloq qinersiffissaq pillugu, allakkatigullu qinersisinnaanermut periarfissamik paasissutissanik nassiuussuisarmat. Ataatsimiititaliap akissuteqaammut innersuussineq imatut paasivaa, periarfissaq taannarpiaq Naalakkersuisunit pitsasuuusutut isigineqartoq, Naalakkersuisut iliuusereriigaat sinnerlugit Naalakkersuisunit allamik iliuuseqarnissamik piumasaaqatitaqanngimmat.

Taamaattumik ataatsimiititaliap kissaatigissavaa, ukiamut ataatsimiinnissami Inatsisartut Kalaallit Nunaanni Inatsisartunut qinersisarnermut Inatsisaannik atuuttumik, inatsisip § 20-ani imm.5, allannguinissamik siunnersummik Naalakkersuisut saqqummiussinissaat,

taamaasilluni sapaatip akunnerinik arfinilinnik periarfissiineq allanngortinneqarluni. Tassungali atatillugu Inatsisinut Ataatsimiititaliap Naalakkersuisut kaammatussavai kalaallit ilinniartut Inatsisartunut qinersinissamut periarfissaannut aporfiusinnaasunik sunilluunniit suli millisaanissaq siunertaralugu, Naalakkersuisut tamakkiisumik qulaajaanermik suliaqarnertik ingerlatiinnassagaat.

Inatsisinut Ataatsimiititaliap inassuteqaataa

Ataatsimiititaliap isumaqatigiittup siunnersuut akuersissutigineqassasoq **inassutigaa.**

Taamak oqaaseqarluni Inatsisinut Ataatsimiititaliap siunnersuut
aappassaaniigassanngortippaa.

Isak Hammond,
Siulittaasoq
Inuit Ataqatigiit

Jørgen-Ole Nyboe Nielsen
Demokraatit

Doris Jakobsen
Siumut

Storm Ludvigsen
Inuit Ataqatigiit

Kristian Jeremiassen
Siumut